

PINIARNEQ 2017

AALLAANIARTUNUT ATASSUTEQAAT PISANILLU NALUNAARSUIFFIIT



EQQAAMAJUK!

**Pisatit kingusinnerpaamik oktobarip
15-iani nalunaarutigissagakkit.**

**Tamanna kiisalu piniarnermut allagartamik
nutaamik qinnuteqarneq imminut sullinnikkut
www.sullissivik.gl-imi pisinnaavoq**

KALAALLIT NUNAANNI PINIARNERMI ILEQQORISSAARNEQ

Allattut: Piniarneq Pillugu Siunnersuisoqatigiit aamma APNN

PINNGORTITAMI MISIGISAT AAMMA IGITAT

Pinngortitaq alianaatsuuvog nunatsinni sumulluunniit pigaluaaraanni. Ukiunili kingullerni nunani tikitani alianaatsortaa takujuminaallisimavoq. Siusinnerusukut nunat alianaatsorsuusimasut maannakkut igitanik qimaannakkanik, puigukkanik imaluunniit aalisarnermi atortunik qimaannakkanik annaasanillu mingutsinneqarsimapput.

Taamatut ileqqoqalersimaneq piaarnerpaamik unitsittariaqarparput. Pinngortitameereernerup kingorna saliinissaq igitassallu il.il. illoqarfimmut oqqunnissaat ajornartorsiutaasariaqanngilaq. Illoqarfinni amerlanerni umiarsualiviit eqqaanni containerit eqqaaviit inissinneqarsimapput, igitassallu iginneqarnissaat akeqarani.

Taamaattumik angalasimagaangavit igitassatit tamatigut nassartakkit. Taamaasiorneq uagutsinnut, kingulissatsinnut, pinngortitami piniarnermilu pitsaanerpaamik misigisaqartitsissaaq.



Saqqaaani: Kalaallit Nunaata avannaani qernertamik qilaluarneq (Ass: Peter Hegelund, Pinngortitaleriffik).

PINIARNERMI ILEQQORISSAARNEQ

Piniakkagut assigiinngitsorpassuit pinngortitarlu alutornartorsuaq piniarnermi naleqanngitsunik misigisaqarnissamut periarfissiipput, pisaq puisuuppat, arfiuppat timmiaappalluunniit apeqqutaatinngagu. Nunatsinni piniarnermi ileqqorissaarnerut isigineqartut immikkoortuni tallimani tulliuttuni allaaserineqarput.

- 1) Piniarneq tamarmi inatsisit atuuttut naapertorlugit ingerlanneqassaaq. Taamaattumik piffissat piniarfissat, nunat piniarfissat pisassiissutillu atuuttut paasiniakkit, aamma illit kommunerisappit avataani aalajangersarneqartut. Nunat eqqissisimatinnegartut aamma timmiaqarfii eqqaanniittut sumiiffiit immikkoortit illersugaasut ataqqikkitt taamaalilluni timmissat eqqissisimallutik piaqqisinnaaqqullugit amerleriarsinnaaqqullugillu.
- 2) Piniarnerup nuannersuuneranut ilaavoq uumasup pisariaqanngitsumik naalliutsinneqannginnissaa. Taamaattumik pingaaruteqarpoq sulloqqortussutsip eqqortup atorneqarnissaa isumannaatsumillu ungasippallaanngitsumiit aallaaninngisaannarit. Uumasup aattorneqarsimasup nammanneqarnissaa qanillisar-niarlugu uumasut pissatarineqassanngillat ungoorneqassanatillu.
- 3) Nunatsinni inoqutigiinnut, atisanut aamma eqqumiitsuliornikkut atortus-siassanik atuinitsinni uumasup tamarmiusup atorneqarnissaa ileqqoraarput. Taamaattumik pisaqaruit neqi allallu nerineqarsinnaasut, atorneqarsinnaasullu allat tamakkerlugit nassartakkit. Taamaaliornikkut pisuussutit uumassusillit ataatsimut pigisavut pitsaanerpaamik pissarsiffigissavagut.
- 4) Piniariarlutit aallannginninni sakkutit misissoqqaakkit. Aallaasivit piniagas-sanut atorneqartinnagu oqattaatigineqarsimanissaa isumannaaruk. Uumasup aallaaniakkavit tunuaniittoqarnersoq tamatigut misissoqqaartassavat. Inuit allat, inissiat, angallatit allallu tungaanut aamma illoqarfiup iluani seqqunngi-saannarit.
- 5) Uumasut pisisatit pillugit tamatigut allattuiuaannarit taamaalillutit piniar-nermut allagartat nutarterneqartussanngorpat ukiumoortumik immersugassat ajornannginnerusumik immersorsinnaaqqullugu. Piniagassat killilersukkat tamaasa pillugit pisanik immikkut nalunaarsuiffissaq immersoruk utertillugulu, taamaalilluni piniagassaqassutsit ineriartorneri pillugit ingerlatsivik sapinngisa-mik pitsaanerpaamik ilisimasaqalersillugu.

Pinngortitaq imaannaanngitsoq nunalu annertoq pillugu isumannaallissaaneq annertuumik pingaartinneqassaaq. Mappersakkap matuma ungaluani imaatigut isumannaallissaaneq pillugu annertunerusumik atuarit.

Piniarluarina!

PISANIK NALUNAARUTEQARTARNEQ – PITSAAQUTIT, PINGAARUTEQARNERA AAMMA PIUMASAQAATIT

Nunatsinni uumasunik piniagassanik aqutsineq naliginnaasumik kinguaariit tullinnguuttut eqqarsaatigalugit taamatullu siunissami piniartut maannakkutut piniagassaqarluarnissaat eqqarsaatigalugu ingerlanneqartarpoq. Nungusaataanngitsumik piniarneq, piaqqiorfiit nalaanni piniarneqannginnissaat kiisalu mianersorneq tunngavigalugu ingerlanneqartarput. Tamanna uumasogatigiit piniarneqartut pillugit ilisimasat nutaat tunngavigalugit kisimi anguneqarsinnaavoq. Taamaatumik unammillernarsinnaavoq Kalaallit Nunaatut angitigisumik nunaqaratta, pissutigalugu ilisimatusarnikkut kisitsisarnerit akisusarmata naak ilaatigut nuna-minertaq isoratuallaanngikkaluartorluunniit.

Nuna tamakkerlugu uumasogatigiillu tamakkerlugit kisitsisoqassagalarpat aningaasatigut piviusorsiorpalaanngilaq. Taassuma saniatigut uumasogatigiit ataasiakkaat amerlassusaat, ineriartornerat kiisalu amerliartornersut imaluunniit ikiliartornersut naliliiffigissallugit kisitsineq ataasiinnaq naammanngilaq. Tassani akulikitsumik kisitsisoqarnissaa pisariaqarpoq.

Kisitsisoqanngikkaangat uumasogatigiinni ataasiakkaani uumasut amerlassusaat malinnaaffigissallugu naak ajornaatsuinnaanngikkaluartoq periarfissaqarluarpoq uumasogatigiit piniakkatta ineriartornerat malinnaaffigissallugit. Tassuunakkut inuussutissarsiutigalugu sunngiffimmilu piniartut ataasiakkaat PINIARNEQ aqqutigalugu ukiumoortumik pisanik nalunaarsuiffik atorlugu nalunaarsuisarnerat iluaqutigaarput.

Uumasut piniakkavut pillugit nungusaataanngitsumik eqqarsarnek qimanngisannarparput. Uumasut piniagassat pillugit ilisimasat naammanngikkaangata taava mianersorneq atorlugu killilersuisoqartarpoq – pissutigalugu amerlavallaanik pisaqarneq kinguneqarnerlussinnaasarmat. Uumasut piniakkat pillugit ilisimasat pitsaanerugaangata taava piniarnissamut periarfissaqarluarnerusarpoq.


ILLIT SULEQATAANISSAT PINGAARUTEQARPOQ

PINIARNEQ aqqutigalugu pisanik nalunaaruteqartarnermiit ilisimasavut ajunngillat, kisianni suli pitsaanerusinnaavoq – ILLIT periarfissaqarputit suli pitsanngorsarnissaanut suleqataaffigissallugu. PINIARNEQ aqqutigalugu kingussikkut nalunaaruteqartarneq imaluunniit nalunaaruteqartannginneq ajornartorsiutaanerpaavoq nalunaaruteqartarnermiit ilisimasat pitsaassusaanut. Pisaqanngikkaluaraanniluunniit aamma nalunaarutigineqartussaavoq, ingerlajuartussamik piniarnermut allagartamik nutaamik pissagaanni.

Nalunaaruteqartarneq ajornannginnerulersinniarlugu PINIARNEQ-mi pisanik nalunaarsuiffeqarpoq aamma ukiumoortumik pisanik nalunaarsuiffik, tassanilu

ilanngullugu nalunaarutigineqarsinnaavoq qassinik aamma qanga pisaqarsimanerluni. Kisitsisinik nassuiaasioorneq sapinngisamik pitsaanerpaattinniarlugu taakkua atorineqartarput. PINIARNEQ aqqutigalugu pisanik nalunaaruteqarnissamut piffissaliussaq tassaavoq 15. oktober, taassumalu kingorna pisanik nalunaarsuiffiit qaammatit pingasut atorlugit immiunneqartarput, ukiorlu nutaaq aallartitsinnagu piniarnermut allagartaq nutaaq sananeqarluni.

PINIARNEQ aqqutigalugu pisanik nalunaaruteqartarneq aqutsiveqarfinni assigiinngitsuni pisarineqartut amerlassusaat pillugit aqutsinermi atugassanik paasisuttisanik pingaarutilinnik tunisisarpoq taakkununngalu piniagassat kil-lilersukkanut akuersissutit utertinneqarnerat ilanngukkaanni taava aqutsinermi ingerlariaqqinnissamut sakkussaqarluarpugut.



Pisanik nalunaaruteqarnissaq pingaaruteqarpoq.

2017-IMIIT ALLANNGUUTIT

2017-ip ingerlanerani piniarnermut allagartamik qinnuteqarneq taassuminngalu nutarterinermi suleriaatsit allannguuteqassapput, Naalakkersueqatigiinnissamik Isumaqatigiissutaasut ilaat naapertorlugit. Suleriaatsit ilai kommuninit tiguneqassapput, aqutsiveqarfiup innuttaasunut kiffartuussinerup ingerlaavartumik pitsanngorsaaneranut atatillugu. Taamaattumik pingaaruteqarpoq allannguutaasussat nutaat pillugit tusagassiorfiit, nittartagaq www.sullissivik.gl aqqutigalugu kiisalu najukkanni innuttaasunut sullissivik malinnaaffiginissaat.

TUTTUT UMIMMAALLU

Aalisarnermut Piniarnermut Nunalerinermullu Naalakkersuisoqarfik (APNN) ukiuni kingullerni tuttnut umimmannullu akuersissutit utertinneqartut amerlisinniarlugit suliniuteqarsimavoq tamannalu ilorraap tungaanut ingerlagaluartuq suli anguniagarpur angunngilarput. Qilalukkat qernertat qaqortallu qiviarutsigit taava akuersissutit utertinneqarneratigut pisanik nalunaaruteqartannginneq unioqutitsilluni pisaqarnertut isigineqartarpoq APNN-imilu maannakkut tuttnut umimmannullu akuersissuterpasuit utertinneqarneq ajortut pillugit sukaterinissamut periarfissanik misissuisoqarpoq. Tamanna ukiup tullissaani akuersissutunik pisinnaanermut sunniuteqariaannaavoq.

Akuersissutit tuttnut umimmaallu pisinneqartut utoqqaassusaat tunnoqassusaallu pillugit Biologinut paasisutissanik pingaarutilinnik imaqarput taakkulu uumasogatigut pillugit naliliinissamut atugassaapput taamatullu siunissami pisassiissutitut aalajangiisuusinnaallutik. PINIARNEQ-mi ukiumoortumik pisanik nalunaarsuiffiit aamma akuersissutini pisanik nalunaaruteqarnerit ilaatigut taakutuaapput pisassiissutunik piniarnissamullu piffissaliussanik aalajangiinissamut tunngavigineqartartut. Piniarnermiit kisitsisit atorlugit nassuiaasiernerup tutsuiginartuunissaa pisariaqarpoq taamatullu inuussutissarsiutigalugu sunngiffimmilu piniartut suleqataanissaat.



Umimmaat ukiaanerani assilisat (Assiliisoq: Nuka Møller Lund, APNN)

Inuussutissarsiutigalugu sunngiffimmilu piniartut tuttunut umimmannullu akuersissutinik tigusaqartut akuersissutit immersoreerlugit utertinnissaat, taamatullu pisanik nalunaaruteqartarneq tuttut umimmaallu illersugaanerat piniagaanerallu pillugit nalunaarutit atuuttut malillugit pisussaaffigivaat. Pisanik nalunaarutit taamaalillutik piniarnermut piffissaliussap naammassineqareernerata kingorna kingusinnerpaamik sapaatip akunnerit marluk qaangiutsinnagit utertinneqassapput.

Tuttu nr.	Ulloq pisaqarfik	Tunnup issussusia (cm)	Angutiviaoq		Norraatsooq		Norralik		Norraq
			Inuusuttoq	Inersimasooq	Inuusuttoq	Inersimasooq	Inuusuttoq	Inersimasooq	
1	5.8.16	3							
2	11.8.16	5							
3	3.9.16	4							
4									
5									

Akuersissummi pisanik nalunaarfissap immersorneqarnissaa pingaaruteqarpoq.


Tuttut umimmaallu tunnoqassusaat pisarineqarfilu pillugit paasissutissat tunngavigalugit Pinngortitaleriffik aamma APNN piniarfinni ataasiakkaani pissutsit pillugit naliliisinnaapput. Piniarfiit ilaanni tuttut umimmaallu nalinginnaasumik salunneruppata imaalluarsinnaavoq piniarfinni pineqartuni tuttut umimmaallu amerlavallaartut akerlianillu tuttut umimmaallu tunnoqarluarpata piniarfinni pineqartuni nerisassaqarluarsimasinnaavoq. Piniartut ilaasa maluginiarsimavaat Kangerlussuup eqqaani sumiiffiit ilaanni umimmaat sumiiffinni allani umimmanut sanilliullugit anginerusartut oqimaannerusarlutillu. Tamanna sumiiffiit ilaanni umimmannut pissutsit pitsaaneruneranik peqquteqarsinnaavoq. Tamakku tamaasa pingaaruteqarluinnaqqissaarput.

QILALUKKAT QAQORTAT QERNERTALLU

QILALUKKANIK QERNERTANIK AQUTSINERMIIT NUTAARSIASSAT

2015-ip ukiaanerani Nuummi ataatsimiinnermi Nunatta Canadallu ataatsimoorussamik kommissionimut (JCNB) qilalukkanut qaqortanut qernertanullu siunnersuineq nutaq biologit saqqummiuppaat. Siunnersuineq nutaq kisitsisinik nutaanik kiisalu aqutsinermi periutsit nutaat atorlugit tunngaveqarpoq. Tunngaviusumik nutaartaa uaniippoq, nunami namminermi iluaqutiginninneq nunap sanilerisap iluaqutiginninnerata apequtaatinnginnera taarsiullugu, maannakkut pisassiissutit nunat assigiinngitsut iluanni aalajangersarneqartalmata. Aqutsinik-kut periutsip nutaap aalajangiisuusumik iluaqutaa uaniippoq, qilalugaqatigiit mikisut sumiiffinni arlalinni pisarineqartartut (nunanit suminngaanneernerat apequtaatinnagu), maannakkut piniakkanik atorluaavallaarnermut illersorneqarsinnaalissammata. Taamatuttaarlu qilalugaqatigiit angisuut attassisinnaasut, ataatsimoorussamik annertunerusumik iluaqutigineqarsinnaalissammata.

*Qilalukkat qernertat
Baffin Bugt-imi ingerlaar-
tarneranik takussutissiaq
(Heide-Jørgensen 2012).
Qilalukkat qernertat Qe-
qertarsuup Tunuaniittartut
Qimusseriarsuar-meersuup-
put, Admiralty Inlet-imeer-
suullutik kiisalu Eclipse
Sound-imeersuullutik.
Uummannap Kangerlua-
niittullu Sommerset Island-
imeersuupput.*



Qilalukkat qernertat qilalugaqatigiinni mikisuni arfineq-pingasuppup taakkulu Canadami aamma Kalaallit Nunaanni aasaanerani uninngaartarfigisaminneersutut nassuiarneqarput, amerlanertigullu avissaarluarsimasarlutik. Qilalukkat qerner-tat aasaanerani uninngaartarfigisartagaanni kisinneqarsinnaasarpup aasaaneranimi ataatsimoorlutik sumiiffinni sinerissamut qanittumi amerlasoorsuanngorlutik kattussimaartarmata. Aasaaneranili kattussimaarfiit taakku arfineq-pingasut pini-arfiusartuniit allaanerujussuppup. Piniarnerimmi sumiiffinni allani 11-ni aamma piffissani allani ingerlanneqartarmata.

Aqutseriaatsimi nutaami qilalugaqatigiinnut assigiinngitsunut arfineq-pinga-suusunut qaqugukkat takkuttarnerat amerlassusaallu apeqqutaatillugu, piniartar-nerit sumiiffinnut piniarfiusinnaasunut aqqanilinnut agguataarneqarput. Piffissap qanoq ilinerani piniarneqartarnerat pingaaruteqarpoq pissutigalugu qilalukkat qernertat ilaat ingerlaartut sumiiffinni aalajangersimasuni piniarneqartarmata.

Qilalugaqatigiit ilaat ikittuararsuppup (soorlu Qimusseriarsuarumiittut) qilalu-gaqatigiinnilu taakkunani sumiiffinnut piniarfiusartunut amerlasuunik pisassiissu-tinut kukkusumik agguarneqarsimanerisa kingunerisinnaavaa Qimusseriarsuarumi qilalugaqatigiit nungutaanerat. Siornatigut ilisimatuut isumaqartarsimagaluarput qilalukkat qernertat Kangerlussuarneersut (Inglefield Bredning-imiit) Kalaallit Nunaata Kitaa tamaat sinerlugu ingerlaartartut. Maannali paasinarsivoq taamaat-toqanngitsoq. Qilalukkat qernertat Kitaaniittartut tassaappup qilalukkat aasaane-rani katerisimaartartuniit assigiinngitsorpassuarneersunit akuleriit.

Taakkununnga pisassiissutinut nutaanut januari 2016-imi atuutilersunut aqut-sinermut tunngatillugu nalinginnaasumik annertuumik allannguinerimik kingu-neqarsimavoq. Aqutsiveqarfiit arlallit malunnaatilinnik annertunerujussuarnik pisassiissuteqalersimappup, arlalialuilli ikileriarsimallutik. Taamatuttaaq Qaanaap avannaatungaani (Etah-mi) nutaamik piniarfeqalersimavoq / aqutsiveqarfeqalersi-mavoq. Ataatsimut isigalugu qilalukkanik qernertanik piniarnermut pisassiissutit qilalukkanik qernertanik 100-ngajannik amerleriarsimappup.



Qilalukkat qernertat timmisartumiit assilisat (Assiliisoq: Mads Peter Heide-Jørgensen, Pinngortitaleriffik).

QILALUKKANIK QAQORTANIK AQUTSINERMIIT NUTAARSIASSAT

Qilalukkanik qaqortanik aqutsinermi nutaarsiassaqarpallaanngilaq, siuliani Kitaata tamakkerlugu pisassiissutaasimasut pisassiissutinit nutaanut allaaneruallaarsimannginneri pissutigalugit. Pisassiissutinit paarlaassuisoqarsimavoq, taamaasillutillu Kalaallit Nunaata kujataa aamma kitaata qeqqa pisassiissutinit annertuneraartunik pisassinneqarsimallutik, ukiorpasuarni Kitaata avannaanerusuaniit pisarineqartanngitsuneersunit. Qilalukkanik qaqortanik aqutsineq nalinginnaasumik ajornannginneruvoq pissutigalugu qilalukkat qaqortat Kitaani pisarineqartartut tamarmik qilalugaqatigiinniit angisuuneersuummata, taakkulu Somerset Island (Canada) aasaanerani najortarpaat. Ukiukkut qilalugaqatigiinnut marlunut avittarput, taakkuninngalu marluusunit annerpaartaat Avannaata imartarsuani ukiisarlutik qilalugaqatigiillu aappaat annikinnerusoq Kitaata sineriaani ukiisarlutik.

TIMMISSAT ILLERSORNEQARNERAT PINIAGAANERALLU PILLUGU MALITTARISASSALIORNEQ

Timmissat illersorneqarnerat piniagaanerallu pillugu nalunaarutip nutarterneqarnera 2013-imiilli ukiakkut APNN-imi sulissutigineqarpoq, tassanilu Pinngortitaleriffimmiit biologit siunnersuinerat 2013-imeersoq tunngaviutinneqarluni. Suliap ingerlanerani Naalakkersuisoq arlaleriarluni nikinneranik peqquteqartumik teknikkikkullu apeqqutit allat peqqutigalugit ukiakkut 2015-imi aatsaat nutaamik tusarniaasoqarsinnaasimavoq. APNN Pinngortitamut Avatangiisinullu Naalakkeruisoqarfimmiit (PAIAN), Pinngortitaleriffimmiit, Aalisartut Piniartullu peqatigiiffiniit, Piniarnermut Nakkutilliisuniit kiisalu NGO-niit tusarniaanermut akissuteqaatinik tigusaqarpoq. Upernaakkut 2016-imi tusarniaanermut akissuteqaatit tamarmik suliarineqarput nalunaarummullu nutaamut ilanngunneqarlutik. Nalunaarut nutaaq kingusinnerpaamik 1. januaarimi 2017-imi atuutilissasoq naatsorsuutigineqarpoq. Timmissanik 2017-imi piniarnissamut sunniuteqartussanik allannguuteqartoqassaaq, tamannalu pillugu pingaaruteqarpoq allannguutinik tusagassiutitigut malinnaalluarnissaaq aamma nittartakkakkut www.inatsisit.gl-imi imaluunniit www.sullissivik.gl-imi. Pilersaarut suli massakkumut (august 2016) Naalakkersuisunut saqqummiunneqarnikuunngilaq. Taamaattumik Naalakkersuisuniit suli massakkumut allannguutinik nutaanik allannguuteqartoqariataarsinnaavoq, taamaasilluta allannguisinnaanissamut immitsinnut pisinnaatippugut.

NALUNAARUMMI ALLANNGUUTIT (AUGUST 2016-IMEERSOQ)

Nassuiaatit pillugit immikkoortortaani maluginiarneqassaaq ingerlatsinermi sumiiffiit immikkoortortanut sisamanut agguataarneqarsimanerat:

Zone 1: Petermann Fjord-imiit Hammer Ø-mut: naleraq Avannarpassissuseq 81o25'20.4" Kippasissuseq V64o25'23.3"-imiit Avannarpassissuseq N74o49'11.5" Kippasissuseq 59o40'43.0"-imut.

Zone 2: Hammer Ø-miit Maligaanut: Avannarpassissuseq N74o49'11.5" Kippasissuseq 59o40'43.0"-imiit Avannarpassissuseq N70o17'4.66" Kippasissuseq 56o57'26.7"-imut.

Zone 3: Maligaaniit Kanajoorartuumut: Avannarpassissuseq N70o17'4.66" Kippasissuseq 56o57'26.7"-imiit Avannarpassissuseq N60o22'46.5" Kippasissuseq 44o59'49.8"-mut.

Zone 4: Kanajoorartuuniit Kap Biot-imut: Avannarpassissuseq N60o22'46.5" Kippasissuseq 44o59'49.8"-imiit N71o52'49.9 Kippasissuseq 22o39'19.6"-imut.



Maniitsup eqqaani innaq timmiaqarfik Sermilinnguaq (Assiliisoq: Niels Lyberth, APNN).

AQUTSIVEQARFIIT, PINIARNISSAMUT PIFFISSALIUSSAT AAMMA ULLORMUT PISASSIISUTIT

Maleruagassat aqutsiveqarfinni ulorianartorsiorfiunerpaasuni sukaterfigineqar-nissaat sulissutigineqarpoq ilaatigut Upernaviup eqqaani Ritenbenk-imi aamma Ittoqqortoormiini.

SUMIIFIIT TIMMISSAT ILLERSUGAAFFIUSUT

Nunatta pinngortitaleriffia (GN) oktobarimi 2013-imi nalunaarusiamik tunni-ussipput, tassanilu takuneqarsinnaavoq sumiiffiit timmissat illersugaasut (FBO) aqqaneq pingasuusuni arfinillit najorneqarunnaarsimasut, taamaattumillu tim-miaqarfittut atuukkunnaarlutik. Sumiiffiit taakku peerneqarnissaat nutaanillu taarserneqarnissaat siunnersuutigineqarpoq. Taamaattoqarnerani APNN-ip Pinngortitaleriffik piumaffigaa timmissat sumiiffii nutaat illersugaasuusinnaasut misissoqqullugit, taakkunanilu ilanngullugit makku misissorluaqquneqarsinnaal-lutik:

- Umasoqatigiit navianartorsiortut illersoqqullugit.
- Sumiiffiit timmiaqarfiulluarsinnaasut illersoqqullugit.

- Timmiaqarfiit nunamik ilisimatusarnermut pingaaruteqartut.
- Timmiaqarfimmi imaluunniit timmiaqatigiinni timmissat ikiliartornerat paasineqartoq.

APNN Junimi 2014-imi timmissat sumiiffiiniq illersugaaffusinnaasunik siunnersuutiniq tigusaqarpoq taakkulu pingaarnerpaatut, naammaannartutut aamma pingarpallaanngitsunut immikkoortinneqarlutik. Sumiiffinni pingaarnerpaatut toqqartorneqarsimasuni APNN 27-usunik toqqartuisimavoq, taamaalillutillu timmissat sumiiffii illersugaasut Kalaallit Nunaat tamakkerlugu appaqarfiit nalunngiluarneqartuusuni 40-t siunnersuutigineqalerlutik.

NALUNAARUMMI NUTAAMI ILIUUTSIT NUTAAT

Nutaatut siunnersuutigineqarpoq taateraag pisassiinikkut piniarneqartalernissaa taateraarniarnissamullu piffissaliussap inatsimmut atuuttumut naleqqiullugu sivitsorneqarnissaa aamma siunnersuutigineqarluni. Aappaattullu kangup piniarneqarsinnaalernissaa siunnersuutigineqarluni.

Nalunaarummi ilanngunneqarpoq sunngiffimmi piniarnermik allagartallit pisinnaatitaaffii assigalugit 2017-imiit uumasoaqatigiinni taakkunani tammajuit-sussarsiorluni piniartoqarsinnaanngornissaa. Timmissat akuersissutilimmik pisat nammineq atugassatut kisimi pisarineqarsinnaapput.

UUMASUT ASSIGIINNGITSUT PILLUGIT PAASISSUTISSAT: INATSISIT, PIFFISSALIUSSAT PINIAGAAFFII AAMMA MALERUAGASSAT

NANOQ

Inatsisit: Kalaallit Nunaanni Nannunniarneq inatsisitigut Nannunik Illersuineq Piniarnerlu pillugit Namminersornerullutik Oqartussat nalunaarutaat nr. 21, 22. sept. 2005-imeersumi malittarisassiuunneqarpoq.

Malugiuk: 2016-ip qiteqqunnerani Kane Basin aamma Baffin Bugt-imi nanoqatigiinni nannunik kisitsinermit kisitsisinik nutaanik takkuttoqarnissaa naatsorsuutigineqarpoq, tamatuma kingorna pisassiissutit nutarteriffigineqassallutik, 2017-imiit atuuttussanik.

Nannunik Illersuineq Piniarnerlu pillugit Nalunaarut nr. 21, 22. September 2005-imeersoq nutarterneqassaaq 2016-imi aasap ukiallu ingerlanerani tamanut ammasumik tusarniutigineqassalluni, tamatuma kingorna suliarineqassaaq. Sulisutigineqarpoq januarip 1-iani 2017-imi atuutitertussanngorlugu saqqummiunneqarnissaa siunertaralugu.

Piffissat nannunniarfusut: septembarip 1-ianiit junip 30-anut Kitaani (Qaanaaq-Nanortalik), kiisalu Oktobarip 1-ianiit-julip 31-anut Kangiani (Ittoqqortoormiit aamma Tasiilaq).

Ilitsersuutit: Nannunik naammattuunermit qanoq pissuseqarnissamut ilitsersuut Namminersorlulik Oqartussat nutarternikuuvaa, tassani aamma nannup toquneqarnerata kingorna amia, niaquata saarnga aamma aqajarua qanoq passunneqas-sanersut ilanngunneqarlutik. Ilitsersuut aamma nittartakkami www.businessin-greenland.gl pissarsiarineqarsinnaavoq.

Sulloqqortussutsinut piumasaqaatit: Cal. .30-06

AAVEQ

Inatsisit: Aavernik piniarneq inatsisitigut Aavernik Illersuineq Piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersumi malittarisassiuunneqarpoq.

Malugiuk: Uumassusilerisunit siunnersuineq piffissami 2014-2018-imut atuup-poq. Naatsorsuutigineqarpoq Aarrit pillugit nalunaarutit atuuttup 2016-imi ukiakkut nutarterneqarnissaa, tassunga ilaalluni tamanut ammasumik tusarniutigineqarnissaa. Tamatuma kingorna suliarineqassaaq, januarip 1-iani 2017 atuutitlernissaa siunertaralugu.

Piffissat piniagaaffiusut: Avannaata imartaani sumiiffiit avannarpasissutsip

70°30'N-ip avannaata tungaani: 1. Oktobarip 1-ianiit Junip 30-ata tungaanut. – Kitaani ukiukkut aaveqatigiit (66°N-70°30'N) Martsip 1-ianiit Apriliip 30-ata tungaanut. Tunumi piffissat piniarfusut: Oktobarip 1-ianiit Juunip 30-ata tungaanut.

Sulloqqortussutsinut piumasaqaatit: Cal. .30-06

ARFERIT ANGISUUT

Inatsisit: Arfernik angisuunik piniarnermi pineqarput; tikaagullik, qipoqqaq, arfivik aamma tikaagulliusaaq, piniarneqarneri inatsisitigut Arfernik Angisuunik Illersuineq Piniarnerlu pillugit Namminersorlutik Oqartussat nalunaarutaat nr. 12, 22. december 2014-meersumi kiisalu Arfattat Angisuut Pissatallu Nalunaarutigineqartarnerat pillugu Namminersornerullutik Oqartussat nalunaarutaat nr. 12, 16. juli 2010-meersumi malittarisassiuunneqarput.

Piffissat piniarfusut: Tikaagullik Martsip 1-aniit Novembarip 30-anut ingerlanneqartarpoq.

Arfivik, Apriliip 1-aniit Decembarip 31-anut. Tikaagulliusaaq aamma qipoqqaq ukioq kaajallallugu piniarneqarsinnaavoq Januariip 1-ianiit-31. Decembarip 31-anut.

Ilitsersuutit: Imarmiunik unioqquitsilluni pisaqartoqartillugu, imminut illersorniarluni imaluunniit piniakkanik killilersukkanik saniatigut pisisuukkanik qassutini saniatigut pisisuuisoqartillugu ilitsersuut nittartakkami www.businessingreenland.gl -imi aaneqarsinnaavoq.

Sulloqqortussutsinut piumasaqaatit: Ataatsimut piniaqatigiilluni tikaagullinniarnermi: Cal. .30-06

PUISIT

Inatsisit: Puisinniarneq inatsisitigut Puisit Illersugaanerat Piniagaaneralu pillugit Namminersornerullutik Oqartussat nalunaarutaat nr. 16, 12. nov. 2010-meersumi malittarisassiuunneqarpoq.

Malugiuk: Qasigiaq aamma sigguttooq (græsæl) Nunatsinni eqqissisimatitaalluinnarmata taakkualu piniarneqartunut ilaangillat.

Piffissat piniarfusut: Puisinniarneq ukioq naallugu ingerlanneqarpoq, Januariip 1-ianiit-Decembarip 31-anut.

Sulloqqortussutsinut piumasaqaatit: Cal. 17HMR, Cal. 22WMR aamma Caliber 20.

QILALUKKAT QAQORTAT QERNERTALLU

Inatsisit: Qilalukkanik qaqortanik qernertanillu piniarneq inatsisitigut Qilalukkat Qaqortat Qernertallu Illersugaaner at Piniagaanerallu pillugit Namminersorlutik Oqartussat nalunaarutaat nr. 7, 29. marts 2011-meersumi malittarisassiuuneqarpoq.

Malugiuk: Qilalukkanik qaqortanik qernertanillu illersuineq piniarnerlu pillugit nalunaarut nr. 1, 1. Januar 2016-meersoq nutarterniarneqalerpoq, taamalu suliarineqareerluni tamanut ammasumik tusarniutigineqassalluni ukiakkut 2016-imi. Tamatuma kingorna nalunaarut nutartigaq saqqummiunneqassaaq januaarip 1-iani 2017 atuutilersinniarneqarluni.

Piffissat piniarfiusut: Ukioq naallugu Qaqortanik Qernertanillu qilalugarniar-toqartarpoq, 1. Januarip 1-ianiik-Decembarip 31-anut.

Ilitsersuutit: Imarmiunik unioqqutitsilluni pisaqartoqartillugu, imminut illersorniarluni imaluunniit piniakkanik killilersukkanik saniatigut pisisuokkanik qassutini saniatigut pisisuuisoqartillugu ilitersuut nittartakkami www.business-ingreenland.gl aaneqarsinnaavoq.

Sulloqqortussutsinut piumasaqaatit: Cal. .30-06.

TUTTUT

Inatsisit: Tuttunniarneq inatsisitigut Namminersorlutik Oqartussat nalunaarutaat nr. 7, Tuttut Nujuartat Illersugaaner at Piniagaanerallu pillugit 27. juni 2013-meersumi malittarisassiuuneqarpoq. Pisisseq atorlugu tuttunniarsinnaaneq periarfissaavoq, nalunaarummi piumasaqaatit malillugit.

Malugiuk: Tuttut pillugit nalunaarut 2010-2012-ip ingerlanerani umimmannut nalunaarutip ilaanik tigusilluni nutarteriffigineqarpoq. 2013-imilu nalunaarut nutarterneqarluni atuutilerluni. Allannguutit annertunersaraat ilaatigut pisisseq atorlugu tuttunniarsinnaalernerneq aamma angallatinik motoorilinnik pisanik assartuinermut atuinerup malittarisassiuuneqarnera.

Sulloqqortussutsinut piumasaqaatit: Inuussutissarsiutigalugu aamma Sunngiffimmi piniarneq: Cal. 222. Tammajuitsussarsiorluni piniarneq: Cal. .243.

UMIMMAAT

Inatsisit: Umimmanniarneq inatsisitigut Namminersorlutik Oqartussat nalunaarutaat nr. 8, Umimmaat Illersugaaner at Piniagaanerallu pillugit 27. juni 2013-meersumi malittarisassiuuneqarpoq. Pisisseq atorlugu uminniarsinnaaneq periarfissaavoq, nalunaarummi piumasaqaatit malillugit.

Sulloqqortussutsinut piumasagaatit:
Sunngiffimmi aamma Inuussutissarsiu-
tigalugulu piniarneq: 6.5x55mm.
Tammajuitsussarsiorluni piniarneq:
Cal. .30-06.

TIMMISSAT

Inatsisit: timmissanik piniarneq
inatsisitigut Timmissat Illersugaaner-
at Piniagaanerallu pillugit Namminersor-
nerullutik Oqartussat nalunaarutaat nr.
8, 2. marts 2009-meersumi malittari-
sassiuunneqarpoq.

Malugiuk: Pinngortitaleriffik maj
qaammat 2016-imi Nunatsinni appat
killiffiat pillugit nalunaarusiorpoq.
Appat pillugit paasisat kingusinnerpaat
takutippaat, Nunatsinni timmiaqar-
finni amerlanerni appaqassutsit sak-
kortuumik kinguariartortut, Qaanaap
eqqaani appaqarfiit pinnatik, taakkua
ajunngitsumik ineriartorunarlutik.
Kalaallit Nunaat tamarmi isigalugu
appaqassuseq 1990-ip kingorna 15
%-imik ikileriarsimapput. Tassani Qa-
anaaq ilaatinngikkaanni tamakkiisumik
kinguariarneq 35-40 %-imik annertus-
suseqarpoq.

Timmissat illersorneqarnerat piniaga-
anerallu pillugit nalunaarutip nutar-
terneqareerluni kingusinnerpaamik ja-
nuaarip 1-iani 2017-imi atuutilernissaa
naatsorsuutigineqarpoq. Ilaatigut appat
aamma mitinut tunngatillugu naatsor-
suutigineqassaaq piffissat piniarfiusunik
aamma ullormi piniarfiusumi ataatsimi
pisarineqarsinnaasunik tunngasunik
allannguuteqartoqarnissaa. Tamakku

tusagassiorfitsigut aamma nittartak-
kami www.businessingreenland.gl-imi
tamanut ammasumik nalunaarutigine-
qarumaarput.

Piffissat piniarfiusut: Timmissanut
piffissat piniagaaffii, nittartakkami uani
pissarsiarisinnaavatit: www.businessingreenland.gl

Sulloqqortussutsinut piumasagaatit:
Cal. 22lr aamma annerpaamik 12ga.
timmiarsiuat.

PINIARNEQ AALLAANIARNERLU PILLUGIT INATSIT

- Piniarneq Aallaaniarnerlu pillugit Inatsisartut Inatsisaat nr. 12, 29. oktober 1999-imeersoq.
- Piniarneq Aallaaniarnerlu pillugit Inatsisartut Inatsisaata allanngortinneqarneranik Inatsisartut Inatsisaat nr. 11, 12. November 2001-imeersoq.
- Piniarneq Aallaaniarnerlu pillugit Inatsisartut Inatsisaata allanngortinneqarneranik Inatsisartut Inatsisaat nr. 9, 15. April 2003-meersoq.
- Piniarneq Aallaaniarnerlu pillugit Inatsisartut Inatsisaata allanngortinneqarneranik Inatsisartut Inatsisaat nr. 1, 16. Maj 2008-meersoq.

Miluumasut Nunamiutat allat

- Kukiffaajuup eqqissisimatitaanera pillugu Namminersornerullutik Oqartussat nalunaarutaat nr. 13, 13. september 2004-meersoq.
- Kalaallit Nunaanni ukallit eqqissisimatitaanerat pillugu Namminersornerullutik Oqartussat nalunaarut nr. 19, 17. maj 1989-imeersoq.
- Kalaallit Nunaanni teriannisat eqqissisimatitaanerat pillugu Namminersornerullutik Oqartussat nalunaarutaat nr. 20, 17. maj 1989-imeersoq.
- Amaqqut Kalaallit Nunaanni eqqissisimatinneqarnissaat pillugu Namminersornerullutik Oqartussat nalunaarutaat nr. 9, 5. maj 1988-imeersoq.

Piniarnermut allagartat

- Inuussutissarsiutigalugu Piniarsinnaanermut Allagartat pillugit Namminersorlutik Oqartussat nalunaarutaat nr. 13, 30. december 2014-imeersoq.
- Sunngiffimmi Aallaaniarsinnaanermut Allagartat pillugit Namminersorlutik Oqartussat nalunaarutaat nr. 14, 30. december 2014-imeersoq.

Piniarnermik Nakkutilliisut

- Piniarnermik Aalisarnermillu Nakkutilliisut suliassaar piginnaatitaaffilu pillugit Namminersornerullutik Oqartussat nalunaarut nr. 28, 30. oktober 1998-imeersoq.

Tammajuitsussarsiniarluni aallaaniarneq

- Akiliuteqarluni Aallaaniarneq Aalisarnerlu pillugit Namminersornerullutik Oqartussat nalunaarutaat nr. 22, 19. august 2002-meersoq.

Qimmit qimuttut

- Qimmit Qimuttut kiisalu Qimeqarneq Qitsuuteqarnerlu pillugit Inatsisartut Inatsisaat nr. 18, 30. oktober 1998-imeersoq.
- Inatsisartut Inatsisaat nr. 28, 18. november 2010-meersumik allanngortinneqartoq.
- Inatsisartut inatsisaat nr. 23, 22. november 2011-meersumik allanngortinneqartoq.

- Kommunit qimmit qitsuillu pillugit ileqqoreqqusaat pillugit Namminersornerullutik Oqartussat nalunaarutaat nr. 15, 19. Juni 2003-meersoq.
- Kitsissunnguit eqqissisimatitaanerat pillugu Namminersornerullutik Oqartussat nalunaarutaat nr. 11, 17. april 2008-meersoq.

Aalisarneq

- Kapisilinniarneq pillugu Namminersorlulik Oqartussat nalunaarutaat nr. 12, 1. august 2012-meersoq.
- Eqalunniarneq pillugu Namminersornerullutik Oqartussat nalunaarutaat nr. 20, 25. august 2005-meersoq.
- Nipisanniarneq pillugu Namminersorlulik Oqartussat nalunaarutaat nr. 6, 21. maj 2014-meersoq.
- Ilulissat Kangerluata, Kangiata, eqqissisimatitaanissaa pillugu Namminersornerullutik Oqartussat nalunaarutaat nr. 10, 15. juni 2007-meersoq.
- Qeqertap Uunartup ilaata, Nanortalup Kommunianiittup, eqqissisimatitaanissaa pillugu Namminersornerullutik Oqartussat nalunaarutaat nr. 11, 19. april 2005-meersoq.
- Qinnguata Qooruata, Qinngup Kujalliup, Tasersuup, Kuussuup, kiisalu Kuussuarmiit Qasigeernermi orpeqarfiup tungaanut nunatap eqqissisimatitaanissaat pillugit Namminersornerullutik Oqartussat nalunaarutaat nr. 12, 19. april 2005-meersoq.

Aallaasit/sakkut

- Amerlasuut aqerlumik sanaat eqqunneqartarnerat, tunisaanerat pigineqarnerallu aamma atugaanerat pillugu Namminersorlulik Oqartussat nalunaarutaat nr. 13, 8. august 2012-meersoq.
- Kalaallit Nunaannut aallaasit pillugit Inatsit nr. 1008, 19. december 1992-meersoq. (www.retsinfo.dk).
- Kalaallit Nunaata avannaarsuani kangianilu Nuna Allanngutsaaliugassatut Immikkoortitaq pillugu Namminersornerullutik Oqartussat nalunaarutaat nr. 7, 17. juni 1992-meersoq.
- Kalaallit Nunaata avannaarsuani kangianilu Nuna Allanngutsaaliugassatut Immikkoortitaq pillugu Namminersornerullutik Oqartussat nalunaarutaata allanngortinneqarneranik Namminersornerullutik Oqartussat nalunaarutaat nr. 16, 5. oktober 1999-meersoq.

Sumiiffiit eqqissisimatitat

- Ivittuut Kangilinnguillu eqqaanni nunap allanngutsaaliorneqarnissaa pillugu Namminersorlulik Oqartussat nalunaarutaat nr. 4, 12. april 2010-meersoq.
- Kuussuup (Austmannadalen) eqqissisimatitaanera pillugu Namminersornerullutik Oqartussat nalunaarutaat nr. 23, 14. juli 2008-meersoq.
- Kalaallit Nunaata Kitaani, Maniit-sup Kommuneani, Arnangarnup Qooruata allanngutsaaliorneqarnera

pillugu Namminersornerullutik Oqartussat nalunaarutaat nr. 31, 20. oktober 1989-imeersoq.

- Qimusseriarsuarmi uumasunik eqqissimatitsivik pillugu Namminersornerullutik Oqartussat nalunaarutaat nr. 21, 17. maj 1989-imeersoq.

Pinngortitamik illersuineq pillugu Inatsit

- Pinngortitap illersorneqarnera pillugu naammagittaalliuteqartarfik pillugu Namminersornerullutik Oqartussat nalunaarutaat nr. 6, 12. februar 2009-meersoq.
- Pinngortitamik illersuineq pillugu Inatsisartut Inatsisaat nr. 29, 18. december 2003-meersoq.

Uumasunik illersuineq pillugu Inatsit

- Uumasunik illersuineq pillugu Inatsisartut Inatsisaat nr. 25, 18. december 2003-meersoq.

Assartuutit

- Assartuutit motoorinik ingerlatillit atorineqarneri pillugit Namminersorlulit Oqartussat nalunaarutaat nr. 10, 10. oktober 2013-imeersoq.
- Aallaaniarnermi angallatit ilaasa atorineqarnissaannut inerteqquteqar-neq pillugu Landsrådip nalunaaru-taa nr. 241, 2. juni 1972-imeersoq.

Inuussutissalerineq pillugu Inatsit

- Inuussutissanik nersutillu nappaa-taannik inunnut tunillaassin-naasunik nakkutilliineq pillugu

Inatsisartut peqqussutaata allan-gortinneqarnera nr. 9, 31. maj 2001-imeersoq (uumassusilinnut tappiorannartunut tunngatillugu pitsaassutsimik nakkutilliineq).

- Inuussutissanik nersutillu nappaa-taannik inunnut tunillaassorsin-naasunik nakkutilliineq pillugu Inatsisartut peqqussutaat (nr. 17, 28. oktober 1993-imeersup allan-gortinneqarnera) peqqussut nr. 7, 2. maj 1996-imeersoq.
- Inuussutissanik nersutillu nappaa-taannik inunnut tunillaassorsin-naasunik nakkutilliineq pillugu Inatsisartut peqqussutaat nr. 17, 28. oktober 1993-imeersoq.
- Suliffeqarfiit inuussutissaleriffiusut pillugit Namminersornerullutik Oqartussat nalunaarutaat nr. 21, 27. juli 1998-imeersoq.

Tunisineq

- Piniakkanik savaateqarnermillu tunisassianik tunisaqarnermi nalunaaruteqartar-neq pillugu Namminersornerullutik Oqartus-sat nalunaarutaat nr. 10, 5. juli 2006-imeersoq.

Inatsisit nittartakkami uani nassaarisinnaavatit www.inatsisit.gl, inatsisip nalunaarutilluunniit atia atorlugu ujaruk imaluunniit ukiua inatsisillu imaluunniit nalunaarutip normua atorlugu.

Kommunimi ileqqoreqqusat

Kommunimi ileqqoreqqusaliat arlallit pigineqarput piniarnermik malittarisassanit sukannernerusinnaasut. Taamaattumik kommunimut angerlarsimaffigisannut saaffiginnigit ileqqoreqqusat sorliit kommuninni atuunnersut paasiniallugit. Assersuutigalugu nunatsinni kommunit ilaanni makkununga tunngasuni ileqqoreqqusaqartitsisoqarpoq: puisinniarnermi, puisinut qassusersornermi, timmiar-niarnermi, qilalukkanut qaqortanut qassusersornermi, qilalukkanut qernertanik piniarnermi, arfernik pilannermi aamma assartuutitut.



Niisap neqaa Kalaaliaqqami ingerlapallattarpoq.

NAJUKKANNI PINIARNERMUT AALAJANGERSAKKAT NALORNISIGIGUKKIT KINA APERISSAVIUK?

Najukkanni piniarnermut aalajangersakkat nalornissutigukkit kommunimi inuussutissarsiornermut siunnersorti tamatigut aperisinnaavat imaluunniit Aalisarnermut, Piniarnermut Nunalerinermullu Naalakkersuisoqarfimmi Piniarnermut Aallaaniarnermullu Immikkoortortaq.

Kommunip najugarisanni piniarnermut tunngasorpassuarnik akissuteqarfigisinnaavaatit, soorlu najukkanni piffissat piniarfiusut atuuttut pillugit, uumasunut killilersukkanut akuersisummik qanoq pissarsisoqartarnera, uumasunik killilersukkanik immikkut nalunaarsuiffiit immersorneqarnissaat allarpassuillu pillugit.

Aalisarnermut, Piniarnermut Nunalerinermullu Naalakkersuisoqarfimmi (APNN) Piniarnermut Aallaaniarnermullu Immikkoortortaq uumasunik killilersukkanik killilersugaanngitsunillu aqutsinermut akisussaavoq.

Aammattaq nittartakkami www.sullissivik.gl piniakkanut tunngasut nalinginnaasumik paasisutissanik pissarsiarineqarsinnaapput.

The screenshot shows the Sullissivik website interface. At the top, there is a navigation bar with the logo 'sullissivik.gl', a language selector set to 'Dansk', a dropdown for 'Vælg kommune', and links for 'Log ind' and 'NemPost'. Below this is a search bar with the text 'Søg' and a magnifying glass icon, and two buttons: 'Vælg et emne' and 'Selvbetjening'. The main content area features a section titled 'Jagt, fangst og fiskeri' with a sub-header 'Find nyttige oplysninger og hjælp, hvis du er erhvervdrager eller erhvervsfisker, går på jagt eller fisker i din fritid, er turist og gerne vil på jagt i Grønland, eller se hvilke særegner, der gælder for de forskellige fangstarter.' To the right of this text is a black and white photograph of a coastal scene with boats and buildings. Below the text and image is a grid of six buttons: 'Fangstarter og jagtbevis', 'Fiskearter og licenser', 'Kontrol', 'Kvoter', 'Erhvervsstatistik ESU', and 'Veterinær- og Fødevarermyndigheden i Grønland'. At the bottom of the grid is a button labeled 'Jagtlister'. The footer of the website contains links for 'HJÆLP', 'ENGLISH', 'TIL MYNDIGHEDER', and 'VIDEOTASERS'. The browser's address bar shows the URL 'https://www.sullissivik.gl/da_hjelp-til-erhvervsdrager' and the system clock indicates '13:41 11-09-2016'.

Adressi ataani allassimasoq atorlugu sulianik sullissisut attuumassuteqartut at-tavigisinnaavatit:

Aalisarnermut, Piniarnermut Nunalerinermullu Naalakkersuisoqarfik

Imaneq 1A, 701

Postbox 269

3900 Nuuk

E-mail tamanit atugassaq: apnn@nanoq.gl

Saaffiginnissutitut uumasunillu killilersugaasunik pisanik nalunaarsuiffinnut

Faxnormu: +299 34 63 55.

Piniarnermut allagartamik qinnuteqarnermi / ukiumoortumik pisanik nalunaaruteqarnermi Faxnormu: +299 34 53 40.

Ukiumoortumik immersugassat pillugit piniarnermut allagartamik qinnuteqarnermi E-mail-adressi: Jagtbeviser@nanoq.gl

